

De Projet de loi ass mat 54 Jo-Stëmme bei 6 Absten-tiounen ugehall.

*Ont voté oui : Mme Diane Adehm, MM. Emile Eicher, Félix Eischen (par Mme Nancy Arendt épouse Kemp), Paul Galles (par M. Serge Wilmes), Léon Gloden, Jean-Marie Halsdorf, Mme Martine Hansen, MM. Max Hengel, Aly Kaes, Marc Lies, Mme Elisabeth Margue, M. Georges Mischo (par M. Max Hengel), Mme Octavie Modert, MM. Laurent Mosar, Gilles Roth, Jean-Paul Schaaf, Marc Spautz, Serge Wilmes, Claude Wiseler et Michel Wolter ;*

*Mme Barbara Agostino, MM. Guy Arendt, André Bauler, Gilles Baum, Mme Simone Beissel, MM. Frank Colabianchi, Fernand Etgen, Gusty Graas, Mme Carole Hartmann, MM. Pim Knaff, Claude Lamberty et Mme Lydie Polfer (par M. Gusty Graas) ;*

*Mme Simone Asselborn-Bintz (par M. Yves Cruchten), M. Dan Biancalana, Mmes Tess Burton, Francine Closener, MM. Yves Cruchten, Mars Di Bartolomeo, Mme Cécile Hemmen, M. Dan Kersch (par Mme Cécile Hemmen), Mme Lydia Mutsch et M. Carlo Weber ;*

*Mme Semiray Ahmedova, M. François Benoy, Mmes Djuna Bernard, Stéphanie Empain, Chantal Gary, M. Marc Hansen, Mme Josée Lorsché, M. Charles Margue et Mme Jessie Thill ;*

*MM. Sven Clement et Marc Goergen ;*

*M. Roy Reding.*

*Se sont abstenus : Mme Nancy Arendt épouse Kemp ;*

*MM. Jeff Engelen, Fernand Kartheiser et Fred Keup ;*

*Mmes Myriam Cecchetti et Nathalie Oberweis.*

Freet d'Chamber d'Dispens vum zweete Vote constitu-tionnel?

(Assentiment)

Et ass also esou decidéiert.

Da komme mer elo zum Vott iwwert de Projet de loi 7691. Den Text steet am Document parlementaire 7691<sup>16</sup>.

### **Vote sur l'ensemble du projet de loi 7691 et dispense du second vote constitutionnel**

D'Ofstëmme fänkt un. Mir maachen de Vote par pro-curation. De Vott ass ofgeschloss.

De Projet de loi ass mat 55 Jo-Stëmme bei 5 Absten-tiounen ugehall.

*Ont voté oui : Mmes Diane Adehm, Nancy Arendt épouse Kemp, MM. Emile Eicher, Félix Eischen (par M. Laurent Mosar), Paul Galles (par Mme Nancy Arendt épouse Kemp), Léon Gloden, Jean-Marie Halsdorf, Mme Martine Hansen, MM. Max Hengel, Aly Kaes, Marc Lies, Mme Elisabeth Margue, M. Georges Mischo (par M. Serge Wilmes), Mme Octavie Modert, MM. Laurent Mosar, Gilles Roth, Jean-Paul Schaaf, Marc Spautz, Serge Wilmes, Claude Wiseler et Michel Wolter ;*

*Mme Barbara Agostino, MM. Guy Arendt, André Bauler, Gilles Baum, Mme Simone Beissel, MM. Frank Colabianchi, Fernand Etgen, Gusty Graas, Mme Carole Hartmann, MM. Pim Knaff, Claude Lamberty et Mme Lydie Polfer (par M. Gusty Graas) ;*

*Mme Simone Asselborn-Bintz (par M. Yves Cruchten), M. Dan Biancalana, Mmes Tess Burton, Francine Closener, MM. Yves Cruchten, Mars Di Bartolomeo, Mme Cécile Hemmen, M. Dan Kersch (par Mme Cécile Hemmen), Mme Lydia Mutsch et M. Carlo Weber ;*

*Mme Semiray Ahmedova, M. François Benoy, Mmes Djuna Bernard, Stéphanie Empain, Chantal Gary, M. Marc Hansen, Mme Josée Lorsché, M. Charles Margue et Mme Jessie Thill ;*

*MM. Sven Clement et Marc Goergen ;*

*M. Roy Reding.*

*Se sont abstenus : MM. Jeff Engelen, Fernand Kartheiser et Fred Keup ;*

*Mmes Myriam Cecchetti et Nathalie Oberweis.*

Freet d'Chamber och hei d'Dispens vum zweete Vote constitu-tionnel?

(Assentiment)

Dann ass et esou decidéiert.

## **8. Ordre du jour**

Et gëtt proposéiert, datt mer déi Projet-de-loien, déi Modèle-de-basen, déi fir de Mëtten um Ordre du jour stinn, esou wäit wéi et méiglech ass, de Moien nach evakuéieren.

(Interruptions)

Mir géifen ufänke mam Projet de loi 8015. Ass d'Chamber domadder averstanen?

(Assentiment)

A wa mer dann nach Zäit hunn, géife mer den 8215 an duerno eventuell de 7959 huelen.

## **9. 8015 – Projet de loi portant modifica-tion :**

### **1<sup>o</sup> du Code pénal ;**

### **2<sup>o</sup> du Code de procédure pénale**

Da kéime mer elo zum Projet de loi 8015, dee gewalttätteg Verhale während Manifestatioune soll ofschrecken an ënnerdrécken. D'Riedezäit ass nom Basismodell festgeluecht. An d'Wuert huet elo de Rapporteur vun dësem Projet de loi, den honorabelen Här Charles Margue. Här Margue, Dir hutt d'Wuert.

### **Rapport de la Commission de la Justice**

**M. Charles Margue** (déi gréng), rapporteur | Voilà! Flexibel si mer jo. An am Respekt vu jiddwerengem senger Zäit ...

**Une voix** | A gutt organiséiert!

**M. Charles Margue** (déi gréng), rapporteur | A gutt organiséiert, jo, preparéiert och. Ech muss meng Agraff nach eraushuelen hei, da geet dat. Voilà.

Den 8015, de Gesetzesprojet 8015, ass am Kontext vun de Manifestatioune géint déi sanitär Mesüre während der Covidkris anzeuerdnen. Well et während dëse Manifestatiounen ëmmer nees zu Aggressiounen an neie Forme vu Gewalt géigeniwwer Policebeamten a géigeniwwer Journaliste komm ass, gouf decidéiert, de Code pénal an de Code de procédure pénale un dës nei Gegebenheeten unzupassen. D'Modifikatiounen er-gängen den aktuelle legale Kader a sanktionéieren all Form vu Gewalt, déi bei Manifestatiounen ausgeübt gëtt a friddlechen Demonstratiounen am Wee steet.

De Projet 8015 gouf den 31. Mee 2022 vun der Justizministesch Sam Tanson deposéiert, de 26. Mee dëst ..., aviséiert. Den 18. ... – ou, do hunn ech e Joresproblem dobäi –, den 18. Mee war e schonn an der Justizkommissioun als Avant-projet de loi, ier en deposéiert gi war. De Staatsrot huet säin Avis zu den amendéierten Texter de 7. Februar 2023 ginn an an der Kommissiounssitzung vum 28. Juni gouf den Avis analyséiert, de Rapporteur bestëmmt an eng Serie Amendementer ugehall. Den Avis complément-naire koum den 11. Juli. Mir hunn eis den Dag drop dermat befaasst, krute Gréng Luucht vum Staatsrot a konnten de 14. Juli dëse Rapport unhuelen. Zwee Avise krute mer vum Staatsrot, wéi gesot, an nach Avise vum Barreau, vun der CNPD, vun der Cour supé-rieure, vum Parquet général a vum Parquet aus der Stad. An dësen Avise waren eng Rei Suggestiounen. Och deene konnt Rechnung gedroe ginn. Merci dofir!

Et geet ëm Folgendes – fënnf Punkten, déi mer an dëser Reform behandelen –:

Verschäerfung vun de Sanktiounen am Fall vu Rebel-lioun: An den Artikelen 271 bis 272 vum Code pénal setze mer déi maximal Strofen, déi kënne gesprach ginn am Fall vu Rebellioun vun enger eenzelter Persoun ouni Waff erop, fir dass de Richter d'Méiglech-keet huet, e Mandat de dépôt auszeschwätzen. Hei gi mer vu sechs Méint op maximal zwee Joer Prisong erop. Wann et ëm Rebellioun vun enger Persoun mat enger Waff geet, gi mer vun zwee op maximal dräi Joer Prisong erop. Dat selwecht maache mir, wa méi wéi just eng Persoun am Spill ass, an do geet dann och déi maximal Geldstrof vun 2.000 op 5.000 Euro erop.

Mir maachen als zweete Punkt eng Erweiterung vum Champ d'application vum Outrage. D'Definitioun vum Outrage gëtt ausgeweit op notamment d'Werfe mat Steng, Béchsen, Dampgranaten an anere Substanzen, ob se da geféierlech sinn oder net. Wichteg ass do – wat mer deemools jo bemängelt hunn –, dass domat d'Späizen op e Mënsch an Zukunft och als Outrage ze bewäerten ass. Mir waren am Covid ënnerwee!

Dreëtens: D'Aféierung vun engem neien Typ vu Menace d'attentat fir d'effentlech Sécherheet. Am neien Artikel 328 vum Code pénal gëtt den Akt vum Werfe vu Substanzen, ob se a sech geféierlech sinn oder net, mee potenziell geféierlech sinn oder als geféierlech erlieft ginn, ënner Strof gestallt. Well dëst Behuelen eng Menace ass an als Ugrëff op Leit oder Bienen, Propriétéiten, ka charakteriséiert sinn, kann ee mat enger Prisongsstrof vun dräi Méint bis zwee Joer an enger Amende vun 251 bis 3.000 Euro bestrooft ginn.

D'Strofe ginn erhéicht, wann dës Menacé gemaach gi vis-à-vis vun engem Deputéierten, engem Member vun der Regierung, engem Magistrat, vis-à-vis vun all Agent vun der Force publique oder enger effent-lecher Persoun. A mir schléissen och d'Berufsjournal-isten an, esou wéi se am Gesetz definéiert sinn. Hei beläfe sech d'Prisongsstrofen dann op sechs Méint bis dräi Joer an d'Amenden op bis zu 5.000 Euro.

De véierte Punkt ass d'Aféierung vum Phänomeen „Doxing“. Wat ass Doxing? Den Doxing ass de Pheno-meen, wou et drëms geet, perséinlech Daten, also Date vu Persounen, ze divulgéieren mam Hanner-gedanken, deem Mënsch ze schueden, zum Beispill privat Donnéeë wéi de Wunnuert vum Journalist op soziale Medien ze deelen, eng Praxis, déi zu Viola-tiounen vum Privatlewe féiere kann. Fir d'Recht op e Privat- a Familjeliewen am digitalen Zäitalter ze schützen, schafe mer eng nei Infraktioun, à savoir en „délit de mise en danger de la vie d'autrui“, wou d'Diffusioun vun Informatioun iwwert eng Persoun sanktionéiert gëtt. Heimat sinn Informatiounen gemengt, déi d'Identifikatioun oder d'Lokalisatioun vun enger Persoun méiglech maachen an d'Zil hunn, der Persoun selwer oder hirer Famill respektiv hire Bienen ze schueden.

Zwee Elementer mussen also virleien – Dir héiert et eras –, fir dass den Delikt als solche kann zréck-behale ginn: Et muss e materiell Element do sinn, also d'Diffusioun vun Informatiounen, an en absicht-lecht Element, eng Intentioun, wou et drëms geet, feststellen, dass d'Informatioun bewosst diffusé-iert ginn ass, fir engem ze schueden, a wou also en onméttelbare Risiko besteet fir déi physesche oder psychesch Integritéit.

Als Strofe sinn do virgesinn: Prisong vun aacht Deeg bis sechs Méint an/oder eng Amende vun 251 bis 5.000 Euro. Da schafe mer och Circonstances aggra-vantes, bei Berufsjournaliste sinn déi virgesinn, à

même titre wéi bei Deputéierten, Agente vun der Force publique oder vulnerabele Persounen. Hei schwätze mir vu Strofe vun dräi Méint bis zwee Joer Prisong oder Amendé vu 5 (veuillez lire: 500) bis 10.000 Euro.

De fénfte Punkt – ech komme geschwënn zum Schluss, Här President –: d'Erweiterung vum Champ d'application vun der Enquête ënner Pseudonym. De Gesetzestext erweidert d'Méiglechkeeten, fir Enquêtes ënner Pseudonym am Kader vun enger Justizprozedur ze maachen. Dëst betrëfft all Criminen oder Delikter, déi via elektronesch Kommunikatioun gemaach ginn.

Dës Dispositioun fir ze enquêtere gëllt awer – ech betounen et ausdrécklech hei –, déi gëllt awer nëmmen am Fall vun enger Flagrance, vun enger Enquête préliminaire oder der Instruction préparatoire, an dat op Uweisung vum Untersuchungsrichter. Bis ewell war déi Prozedur just méiglech am Fall vun Infractionen, wann et ëm d'Staatssecherheet, Terrorismus oder Finanzement vum Terrorismus gaangen ass.

Mat dëse Punkte bessere mir haut eise Code pénal an d'Prozedur no, fir se un déi haiteg Gegebenheiten unzepassen um Niveau vun den Untersuchungsméiglechkeeten an dem Schutz vun de Journalisten a vun de Forces de l'ordre.

Ech ginn den Accord vun der grénge Fraktioun a soe Merci fir d'Nolauschteren.

**M. Fernand Etgen, Président** | Merci villmools dem Här Rapporteur Charles Margue.

An éischten ageschriwwene Riedner ass den honorabelen Här Laurent Mosar.

#### Discussion générale

**M. Laurent Mosar (CSV)** | Jo, ech fänken och u mat engem Merci un eisen Dauerrapporteur vun der Commission de la Justice, deen eis elo e ganz flotte Projet hei virgestallt huet, deem mir natierlech wäerten eis Zoustëmmung ginn. Mir kënnen eis och alleguerten drun erënneren, wat während deenen ominéisen Demonstratiounen alles virgefall ass, vun Attacken, Aggressiounen géint d'Forces de l'ordre, géint Journalisten, zum Deel och géint Politiker, eppes, wat mir nëmme kënnen heftegst verurteilen! A mir musse wierklech soen, datt mer dëse Projet – an dat kënnt jo net ëmmer vir, wann et sech ëm e Projet vun der Regierung handelt – awer mat grousser Begeescherung kënnen stëmmen, well sech och do eng Rei vu Fuerderunge vun der CSV ermënnen, déi notament och mäi Kolleg Leo Gloden eng Rei vu Kéieren op dëser Plaz an och op anere formuléiert huet.

Dëst ass e gudden Text, deen och wäert derzou bäidroen, datt d'Forces de l'ordre, déi et souwisou net ëmmer einfach hunn, hei weesentlech besser geschützt ginn, datt och Sanktiounen an d'Luucht gesat ginn, well dat dote sinn net Bagatellen, wann ee géint d'Forces de l'ordre virgeet. Et ass och wichtig, datt d'Journalisten hei geschützt sinn, och iwwerens d'Politiker. An duerfir kënnen mir just nëmmen eis Zoustëmmung zu dësem wichtege Gesetz ginn.

**Mme Octavie Modert (CSV)** | Très bien!

**M. Fernand Etgen, Président** | Merci villmools, Här Mosar. An nächsten ageschriwwene Riedner ass den honorabelen Här Pim Knaff. Här Knaff, Dir hutt d'Wuert.

**M. Pim Knaff (DP)** | Merci, Här President. Léif Kolleginnen a Kollegen, iwwert déi lescht Jore gouf et vill Polemik ronderëm d'Demonstratiounen hei am Land. Deels hate sech och hei am Haus Persounen op d'Säit vun deene Manifestante gestallt,

déi gemengt hunn, hirer Meenung mat Kaméidi a Krawall mussen Ausdrock ze verleen. Duerfir géif ech am Virfeld zwou Saache gäre festhalen. Éischstens, den Artikel 23 vun eiser Verfassung: „La liberté de manifester ses opinions et la liberté de la presse sont garanties, hormis les infractions commises à l'occasion de l'exercice de ces libertés.“ An zweetens, den Artikel 25 vun der Verfassung: „Toute personne a le droit, dans le respect de la loi, à la liberté de réunion pacifique.“

Mir erënneren eis all ganz gutt un déi Biller, déi nom 4. Dezember 2021 hei an och am Ausland duerch d'Press gaange sinn: 2.000 opgewullt Demonstranten an e grouse Block dovunner, dee sech mat Gewalt Accès op de Stater Chrëschtmaart verschafft huet, fir dann do tëschent de Gäscht an de Familljen – deelweis mat Kanner – gewalttätig an aggressiv ze manifestéieren. Dobäi ass et leider net bliwwen: Gewalttätig Demonstratiounen uechtert d'Stad, Piquete viru Privathaiser, Ugrëff op Membere vun der Police a Leit, déi do deels hir Kanner derbäi haten an esou net just sech selwer, mee och hir Klengst dëser Gewalt ausgesat gesinn hunn.

Iwwert déi lescht Jore kouw et ëmmer méi oft zu esou aggressiven Ausschreitungen. Casseure vun hei, mee och aus dem Ausland, stoussen zu friddlechen Demonstratiounen derzou, fir vun der Geleeënheet ze profitéieren, Onrou ze stëften, gewalttätig ze ginn a fir kierperlech Gewalt auszeüben géint jiddereen, dee sech hinnen an de Wee stellt.

Och d'Bezirksgericht aus der Stad an den Ieweschte Gerichtshaff hunn an hiren Avisen zu dësem Projet drop opmierksam gemaach, dass se ëmmer méi mat esou Verhalensweise konfrontéiert sinn. D'Membere vun der Police, Ambulancier, Leit, déi do sinn, fir eis ze hëllefen, wa mir si am dréngendste brauchen, gi mëttlerweil deels am Asaz aggresséiert an ugegraff. Och Journaliste geroden ëmmer méi an de Collimateur vun dësem Behuelen.

Här President, Léif Kolleginnen a Kollegen, dat kann net sinn a mir kënnen dat an eiser Gesellschaft net toleréieren a scho guer net akzeptéieren!

**Une voix** | Très bien!

**M. Pim Knaff (DP)** | Mat dësem Gesetz – an den Här Rapporteur huet et a sengem Rapport am Detail explizéiert, an ech soen ëm dofir och nach eng Kéier Merci –, gëtt kengem d'Recht geholl, dierfen ze manifestéieren. Dat ass e fundamentaalt Recht!

An der ganzer Debatt muss och kloer gesot ginn, dass de Gros vun de Leit meeschtens friddlech demonstréiert a sech näischt zeschole komme léisst.

**Une voix** | Très bien!

**M. Pim Knaff (DP)** | Jo, et gouf och déi – mee et gouf eeben och déi aner! Aggressioun a Gewalt dierfen ni d'Äntwert sinn, esou e Behuele muss ënnerbonnen a virun allem och vermidde ginn! Dofir ass et wichtig, dass mat dësem Text dës Faiten och méi schnell a méi staark bestrooft kënnen ginn. An et ass och wichtig, dass esou Saache wéi notament den Doxing ënnerbonne ginn. Et dierfen net einfach esou privat Donnéeën vu Leit circuléieren mam Zil, dës Leit ënner Drock ze setzen, ze harceléieren oder, schlëmmer nach, si esou eeschthaf a Gefor ze bréngen. Rebellioun, Gewalt an Aggressioun mussen kënnen konsequent ënnerbonnen oder bestrooft ginn, fir d'Sécherheet vum öffentlechen Raum a fir d'Sécherheet vun deene Mënschen, déi hei liewen.

Och d'Enquête ënnert engem Pseudonym am digitale Raum ass eng wichteg Avancée an dësem Kontext. Gewalt fënnt net méi just dobause statt, mee se fänkt hautdesdaags oft schonn am digitale Raum

un. Och hei ass et wichtig, anzegräifen, ze reagéieren a virun allem – an dat gëllt och fir den öffentlechen Raum – ze sensibiliséieren, fir dass mir och an Zukunft eis Problemer zesummen am Dialog an net duerch Gewalt kënnen léisen. Dofir ass dësen Text wichtig, en erlaabt et, besser kënnen anzegräifen, wann et néideg ass, dëst am Sënn vum Schutz vun alleguerten de Leit.

Dofir soen ech Iech och elo Merci fir d'Nolauschteren a ginn den Accord vun der DP-Fraktioun.

**Plusieurs voix** | Très bien!

**M. Fernand Etgen, Président** | An ech soen dem Här Knaff Merci a ginn d'Wuert weider un den honorabelen Här Dan Biancalana. Här Biancalana, Dir hutt d'Wuert.

**M. Dan Biancalana (LSAP)** | Merci, Här President. Virop jo och dem Rapporteur merci fir säi mëndlechen a schrëftlechen Rapport. Bon, de Projet, dee mer haut stëmmen, et ass virdu schonn ugeklongen, ass eng Reaktioun op d'Manifestatiounen an d'Ausschreitungen am Kader vun der Covidpandemie. An et ass awer schonn eng kleng Reformchen, déi mer maachen, well effektiv gréisser Ännerungen – notament Verschäerfungen – stattfannen am Kader vun eise Code pénal.

Bon, d'Pandemie ass eriwuer, mir kucken no vir. An awer kucke mer haut kuerz no hannen an awer och erëm eng Kéier an d'Zukunft am Kader, wou nei Ausschreitungen gëife stattfannen. An awer huet een och nach e bëssen e Bléck op déi Biller, déi rezenterweis och a Frankräich geschitt sinn am Kader vun den Ausschreitungen.

Ech mengen, et ass u sech, et misst een hei soen, traureg, wann ee Gesetzestexter muss upassen an och verschäerfe muss weinst Ausschreitungen, an dat an enger Period, wou effektiv Mesüeren, staatlech Mesüeren, Covidmesüeren ..., wou gewaltsam vun enger Minoritéit ausgedroe goufen. An do gouf et natierlech och Iwwergrëffer op Polizisten an och op öffentlech Persounen. An ech mengen, dass effektiv dat stattfont huet während enger Zäit, wou mer alleguerten zesummestoungen. A mir hunn och matkritt, dass am Mee, also ganz rezent, och an deem Kontext véier Männer vum Bezirksgericht hei an der Staat verurteilt goufen.

Vill Manifestatiounen sinn am Ufank friddlech verlaaf, sou wéi d'Marche blanche. Et sinn der awer och verschidder, déi sinn eskaléiert an et ass zu Iwwergrëffer komm, an ech mengen, dass een dat ganz kloer net dierf dullen! A mat deem Gesetz, dat mer haut hei stëmmen, gi mer och do e kloer Message: Also, d'Manifestatiounsrecht ass sécher e fundamentaalt Recht, dat an eiser Verfassung och nach weiderhi verankert ass, mee dat Recht gëtt kee Recht op Gewalt an op Aggressivitéit. All Bierger dierf op d'Strooss goen a säin Onmutt friddlech géint eng Decisioun effektiv ausdrécken. Dat ass och gutt esou, dat ass och wichtig esou. Mee doduerch dierf dann och d'Sécherheet vun de Forces de l'ordre, vun de professionelle Journalisten an och vu Persounen, déi en öffentlechen Charakter hunn, net op d'Spill gesat ginn an och déi mussen geschützt ginn. A mir mussen awer och, mengen ech, eis agestoen, dass déi Ausschreitungen ënnert där Form, wéi se och stattfont hunn, an deem Ausmooss en neit Phenomeen waren hei zu Lëtzebuerg an déi och d'Police virun eng ganz Rei Erausforderungen gestallt hunn an déi si och, mengen ech, mat Brio och gemeeschtert hunn.

De Rapporteur ass virdu och drop agaangen, och mäi Virriedner: En neit strofbaart Verhale gëtt agefouert, den Doxing, Cyberharcèlement, den Drock, deen iwwer Internet och ausgeübt ka ginn. An och



hei, mengen ech, e ganz kloer Message, dee mer vis-à-vis vun esou engem neie Phenomeen hei ginn, andeems en och kloer strofbar gëtt, well eng nei Form vu Mise en danger d'autrui och deemtspriechend hei stattfënt.

Ech mengen, dass et wichteg ass, d'Sécherheet vun alle Membere vun eiser Gesellschaft ze garantéieren, ob si en ëffentlecht Amt ausüben oder net. Mee de Message no bausse muss sinn, dass eis Forces de l'ordre, eis professionell Journalisten an och Politiker Mënsche wéi och all anerer sinn an dass si weinst hirer Fonctioun, déi se ausüben, absolutt kee Fräiwëld sinn, dat ouni Rücksicht op hir Persoun oder hiert Ëmfeld belästegt respektiv ugegraff ka ginn.

An dofir droe mer och als LSAP-Fraktioun dëst Gesetz mat, dat zu enger Verschäerfung och vum Code pénal bäidréit. Merci.

**Plusieurs voix** | Très bien!

**M. Fernand Etgen**, Président | Merci, Här Biancalana. An da wier et um honorabelen Här Fernand Kartheiser.

**M. Fernand Kartheiser** (ADR) | Jo, Här President, villmools merci. Dat hei ass jo och e ganz wichteg Gesetz. Ech mengen, do si mer eis alleguer eens, well et ass ganz kloer – an ech wëll dee Message och hei daitlech ënnersträichen –, dat et fir eis net a Fro kënnt, dat kann op Poliziste gespaut ginn, dat ka mat Steng geheit ginn, oder esou änlech Saachen, wéi se hei beschriwwen gi sinn. Den Här Margue huet eis dat gutt erkläert. Dofir och e grouse Merci. Also, d'ADR dréit dat hei mat!

Ech wollt eigentlech och guer net vill doriwwer schwätzen, well et u sech eng Selbstverständlechkeet ass, dass eis Force de l'ordre, ëffentlech Autoritéiten an esou weider, geschützt ginn. A wa mer Lacunne feststellen, da mussen mer natierlech kucken, dass mer déi compléieren. Also u sech, och am Liicht vun deem, wat elo a Frankräich geschitt ass an esou weider, sinn dat hei leider, muss ee soen, sënnavoll Moossnamen, déi mer als Staat mussen huelen, fir den Ordre public kënne oprechtzuerhalen.

Wat mech e bësse genéiert an deenen Diskussiounen – dofir wollt ech och elo awer e Wuert soen –, dat ass eigentlech, dass dat mat de Covidmanifestatiounen esou op eng relativ eesäiteg Manéier justifiéiert gëtt. Et sinn do Saache geschitt, déi ni hätten dierfe geschéien – loosst eis dat kloer soen. Ausschreitungen, wa Polizisten ugegraff ginn, an esou weider, dass ass net akzeptabel! Dat gëllt fir all Zort vu Manifestatioun, och fir déi Covidmanifestatiounen.

Mee et feelt eng Introspektioun. Ech hätt geduecht, elo, awer e Joer oder méi no de Fäiten, wär d'Regierung awer kapabel fir ze soen, oder déi Parteien, dass si och vläicht e bësse wäit gaange sinn! Dat justifiéiert net d'Gewalt, déi do geschitt ass, mee et misst ee sech awer vläicht och iwwerleeën, ob net en Drock ausgeübt ginn ass, deen net gutt war fir eis Gesellschaft; 2G, wat Leit ausgeschloss huet aus der Gesellschaft, wat Verschiddener an eng ekonomesch Noutsituatioun gedréckt huet. Oder wou mer haut wëssen, dass déi Niewewierkunge vun den Impfstoffen, dass dat keng Halluzinatioun war, déi déi Leit do haten. Mee dat ware reell Fäiten.

Haut si mer mat de Konsequenze konfrontéiert. Also déi Ängschten, déi Verschiddener deemools haten, fir manifestéieren ze goen, d'Integritéit vun hirem Kierper. Dat huet sech haut als richteg erausgestallt! An trotzdem héiere mer net vun der Regierung: „Jo, mir si vläicht e bësse wäit gaang an deem Drock, dee mer op d'Leit ausgeübt hunn, fir se praktesch awer ze zwängen, och ouni legal Basis, fir sech impfen ze loosser, sous peine vun ekonomesche Konsequenzen

an ouni Rücksicht op déi Leit, déi awer Ängscht hate virun deenen Impfstoffen, déi hinnen offréiert goufen.“ A wéi gesot, eng Rei vun deenen Ängschten huet sech elo leider confirméiert.

Eis Approche ass, mengen ech, ëmmer eng gewiescht an där ganzer Diskussioun – si ass et haut nach – vu grousser Moderatioun, an einfach vu Respekt virun de Positiounen vun deenen engen an deenen aneren.

Ech mengen, et kann net sinn, an där Situatioun, wéi mer se haten, dass Leit esou bewosst vun enger Regierung marginaliséiert ginn, wéi et deemools geschitt ass.

An op där anerer Säit kann et net sinn, dass Leit an Demonstratiounen Gewalt benotzen.

Déi zwou Saache mussen richteg sinn. Et muss een openeen duerkommen. Mir brauchen e Klima vu géigesäiteger Toleranz a géigesäitegem Respekt an der Gesellschaft! An, ech mengen, dat Element huet mer bis elo an der Diskussioun gefeelt.

Ech wëll och soen, dass mer eppes aneres mussen opschaffen. Dat ass och, wéi d'Regierung selwer mat dem Phenomeen vun de Manifestatiounen ëmgaangen ass. Et ass net vergiess, well et huet mech déif schockéiert – ech muss Iech dat soen –, dass eng Demonstratioun vu majoritär ..., 90 %, 95 %, ech weess et net, wou e puer Leit derbäi waren, déi Exzesser gemaach hunn, confinéiert gouf an enger Avenue an der Stad, wou Leit stonnelaang, och eeler Leit, an der Keelt stoungen, ouni kënne op eng Toilette ze goen.

*(Interruption)*

Dat steet och net am Policegesetz. Et steet net do! A mir hätte gär, wa mer esou vill vu Rechtsstaat schwätzen – hei, mir hunn iwwer de JU-CHA geschwat, mir hunn iwwer aner Saachen hei geschwat, an all Riedner, ma et ass jo och gutt, dass mer dat maachen, insistéiert op de Respekt vum Rechtsstaat –, da mussen mer och déi rechtsstaatlech Manéieren huelen, déi am Policegesetz stinn, fir mat enger Manifestatioun ëmzegoen. A mir kënne net eppes erfannen, wat um Niveau vun Diktature ronderëm d'Welt ass, fir Leit op enger Strooss stoen ze loosser. Nee, dat geet net!

*(Interruptions)*

Et geet net! An et ass gutt, dass dat hei am Parlament gesot gëtt: Et kann een net eeler Leit stonnelaang ouni Toilette an enger Strooss stoe loosser, wou se net erauskommen!

*(Interruption)*

Dat geet net!

Also, wéi gesot, eis Approche ass eng ganz kloer: Mir kritiséieren déi Gewalt, déi gemaach ginn ass, awer mir kritiséieren och déi Politik vun der Regierung – eng aktiv Intoleranz, déi do bedriwwen ginn ass.

E lescht Wuert wëll ech awer och soen. Dat ass, dass déi Diskussiounen net eriwuer sinn. Et wonnert eis elo, wou déi Pandemie och endlech offiziell hei op en Enn komm ass, dass mer erkläert hunn am leschte Gesetz, dass dat eriwuer ass. Et ass héich Zäit ginn, dass dat erkläert ginn ass. Mir ënnerstëtzen dat selbstverständlech och. Mir hunn et laang gefuerdert.

Mee mir wëllen awer och soen, dass nach ëmmer déi selwecht Regierung en Dossier huet – e Projet de loi, d'Madamm Tanson huet deen ausgeschafft – iwwer eng Impfflicht am Covid, wou mer awer elo gesinn, wou d'Problemer leie mat deenen Impfstoffen – massiv. Et gëtt Zäit, dass och dee Projet de loi an den Tirang geluecht gëtt, wou en ni méi opdaucht! Ech soen Iech Merci.

**M. Fernand Etgen**, Président | Merci, Här Kartheiser. An da geet d'Wuert un den Här Marc Goergen ..., nee, d'Madamm Nathalie Oberweis.

**Mme Nathalie Oberweis** (déi Lénk) | Merci, Här President. Merci och dem Rapporteur fir de Rapport. Jo, wéi am Exposé des motifs betount, ass dëse Projet de loi an enger éischer Linn e Resultat vun de Virfäll ronderëm d'Demonstratiounen géint d'sanitäre Moossname während der Pandemie. Virfäll, vun deene mir eis kloer distanzéieren.

De Projet de loi viséiert dowéinst ënner anerem, d'Strofe weinst Rebellioun eropzesetzen. Während ee beispillsweis aktuell fir Rebellioun ouni eng Waff tëscht aacht Deeg a sechs Méint Prisong riskéiert, ass elo virgesinn, d'Maximalstrof heifer op zwee Joer eropzesetzen.

Dëst huet ënner anerem zur Konsequenz, dass e Richter e Mandat de dépôt géint eng Persoun erlosse kéint, déi weinst Rebellioun ouni eng Waff festgehall gouf, sous condition, dass eng Fluchtgefor besteet, dass Beweiser vertuscht kéinte ginn an dass e Risiko besteet, dass déi ugeklote Persoun weider Strofdote begeet.

Här President, et stëmmt, dass d'Demonstrationsrecht, esou fundamental wichteg et och ass fir eng Gesellschaft, keen absolutt Recht ass, dat et engem erlaabt, alles ze maachen, wat ee wëll. An natierlech muss een et zesumme mat den Iwwerleeungen zur ëffentlecher Sécherheet an zu anere Rechter betruechten. Trotzdem gesi mir dëst Objektiv vun enger Verschäerfung vun de Strofe weinst Rebellioun ganz kritesch, grad well als eenzeg Motivatioun d'Argument vum Mandat de dépôt ugeféiert gëtt.

Et muss ee bedenken, dass d'Gerichter d'materiell Element vun der Rebellioun extreem breet definéieren. Dat bréngt mat sech, dass och Handlungen, wou et net emol zu engem Kontakt tëscht engem Demonstrant an engem Beamte kënnt, als Rebellioun qualifizéiert kënne ginn, soubal eeben d'Handele vun Demonstrant de Beamten dorunner hënnert, seng Aufgab auszuféieren. Grad am Kader vun Demonstratiounen vun Aktivisten an Aktivistinnen, déi ouni iergend eng Intentioun vu Gewalt handeln, mee sech beispillsweis nëmmen un iergenden Objet pechen, si mir also séier bei der Infractioun vun der Rebellioun.

Ech mengen, ech sinn net dat Eenzege heibannen, dass schonn dacks op Klimamanifestatiounen, Friddensmanifestatiounen, Mënscherechtsmanifestatiounen an esou weider war. An et kommen der nach a mir wäerte weiderhin op d'Strooss goen.

Et muss een an deem Kontext soen, dass vill Leit sech muechtlos spiere vis-à-vis vun deenen enormen Eerausforderungen, virun deene mir stinn. De Klimawandel gëtt net konsequent genuch bekämpft a Mënscherechtsviolatiounen gi weiderhin a Kaf geholl. Virun deem Hannergrond si Leit tentéiert, well se sech muechtlos spieren a keng Hoffnung méi hunn. An ech versti se, sech un de Buedem ze pechen, Stroossen ze blockéieren oder eventuell neie Stroossebau ze blockéieren.

Wéi och an den Avisen vum Conseil d'État a vum Conseil de l'ordre gutt duergeluecht, kann awer elo e strikt Applizéiere vun dësen Texten, wann dann elo d'Strofen eropgesat solle ginn, zu enger Limitéierung vun Demonstrationsrecht féieren, well eeben hei elo d'Dier vun engem Mandat de dépôt géint dës Persoun opgemaach gëtt.

Här President, d'Demonstrationsrecht, dat mat dem Recht op d'Äusserung vun engem senger Meinung verwuerzelt ass, ass e grondleeënde Bestandteil vun

demokratische Gesellschaften a spillt eng wichteg Roll bei der Förderung vum soziale Wandel. D'Demonstrationsrecht gëtt nämlech beispillsweis all Persoun, iwwer de gesamte politesche Spektrum ewech, d'Méiglechkeet, eng Regierung an d'Verantwortung ze zéien, existéierend Ongerechtegkeeten unzepirangeren an d'Bewosstsi fir Problemer ze schäerfen. Geneesou erlaben Demonstratiounen Minoritéiten, Aktivisten an Aktivistinnen, souwéi Bierger a Biergerinnen, fir op politesch Sujeten opmierksam ze maachen, déi anerefalls eventuell ignoréiert gi wieren.

Wann ech un all déi grouss Erausforderungen denken, virun deene mir stinn, dann denken ech, datt mir en ëmsou méi staarkt Demonstrationsrecht brauchen! An dësem Hibleck kënnen mir d'Objektiv vun der Verschäerfung vun de Strofe fir d'Rebellioun net matdroen. Merci awer fir d'Nolauschteren.

**M. Fernand Etgen, Président** | Merci, Madamm Oberweis. An da wier et elo um Här Marc Goergen.

**M. Marc Goergen (Piraten)** | Merci, Här President. Merci dem Charles Margue fir dee gudden Schrëftlechen a mëndleche Rapport. Sécherlech ass dat heiten e bësse méi e komplizéiert Thema. Et huet mat de Coronademonstratiounen ugefaangen. Déi eng fannen d'Motiver, déi d'Demonstranten deemools haten, gutt, déi aner fanne se net esou gutt. Mee trotzdem, egal wéi eng Motiver een huet a wéi eng gutt Absichten ee vläicht huet, ass et awer net ze toleréieren, dass eis Polizisten ugespaut ginn, grad mat der Bemierkung: „Hei, ech ginn der de Corona weider!“

Ech verstinn do och meng Virriedner net, dass een dat kann iergendwéi schéischwätzen. Dofir mussen mer déi Gesetzter upassen. Et kann och net sinn, dass Privatadressen oder soss Informatiounen vu Politiker a Journalisten dobaussen zirkuléieren, gepost ginn, mat deem eenzege Resultat, net fir hinnen eng Blumm ze schécken, eng Freed ze maachen, mee fir se einfach scho quasi ze bedroen an ze soen: „Wann s du elo net ophäls, deng politesch Vue“, déi demokratécher awer legitiméiert ass, „ze vertrieben, da kucke mer emol, dass deng Adress iwwerall ronderëm geet, a vläicht kënnt eng Kéier ee bei dech heem, deen net esou frëndlech gesénnt ass.“ An dofir ass et gutt, dass mer dat eng Kéier an dësem Gesetz klärféieren, dass dat eeben déi Punkte sinn, déi net ginn. Well fir eis gëtt hei net d'Demonstrationsrecht ausgehiewelt, et gëtt just besser encadréiert fir eeben déi Leit, déi Polizisten, déi müssen um Terrain aktiv sinn.

An et ass virduen ugeschwat ginn: Et sinn och heiansdo Casseuren, déi eeben nun emol aus dem Ausland heihinner kommen. An do brauch eis Police eng Handhab. Déi kënnen net einfach dostoen an hinnen de Fanger weisen. Nee, déi brauchen Gesetzter, déi brauchen ganz kloer hir Moyenen, fir kënnen dergéint virzegoen.

Dofir wäerte mir dat heiten och haut matstëmmen. Merci.

**M. Fernand Etgen, Président** | Merci, Här Goergen. Da geet fir d'éischt d'Wuert un den Här Roy Reding. Duerno kritt d'Madamm Oberweis nach eng Kéier d'Wuert.

**M. Roy Reding (Liberté Chérie)** | Jo, merci, Här President. Ech konnt d'Begeescherung vun der CSV, fir d'Gesetz hei matstëmmen, novollzéien. D'CSV war ëmmer begeeschtert, fir d'Propositionen vun der Regierung nach ze iwwertreffen, wann et ëm Mesüre gaangen ass, déi d'Fräiheet ageschränkt hunn an der Coronazäit.

**Une voix** | O!

**M. Roy Reding (Liberté Chérie)** | Wat mer hei erliewen, ass en typesche Framing. Fir d'éischt gëtt geschwat vu Kaméidi a Krawall, vu Gewalttätigkeeten, vu Casseuren, an domadder justifizéiere mer dann déi Texter hei.

De Fakt ass, datt do Dausende vu Leit friddlech manifestéiert hunn, an dat ass d'Recht op Manifestatioun. Jo, et gëtt kee Recht op Gewalt, mee et gëtt awer e Recht op Manifestatioun! An dat gouf massiv – massiivst! – ageschränkt.

1999 ass e Pensionsregimmiwessel gestëmmt ginn an der Chamber. Deemools huet d'Chamber um Knuedler siegéiert. Dausende vun opbruechten Demonstranten waren do an hunn – déi Kollegen, déi deemools schonn an der Chamber waren, kënnen sech warscheinlech erënneren – mat Tomaten an Eeër op d'Deputéiert gehait. Déi hu misse geschützt gi vun der Police mat Prabbelien.

*(Interruption par Mme Nancy Arendt épouse Kemp)*

Just bei e puer Politiker, wann déi laanscht komm sinn – nämlech déi vu 5/6 Pensioun fir jiddereen – ass aus de Polizisten e Staatsbeamte ginn a se hunn de Prabbeli zougemaach. An Dir kënnt Iech bestëmmt erënneren, Här Di Bartolomeo, datt zum Beispill den Här Gibéryen oder den Här Mehlen an d'Chamber komm si wéi eng eenzeg Omlett.

Dat war net schéin. Mee mäi Gott, et war eeben e bësschen eng Demonstratioun, déi aus dem Rudder gelaf ass. Déi, vun där Dir elo schwätzt, jo, do sinn e puer Eeër geworf ginn, net op e Mensch, mee op eng Fassad. Ech soen net, dass ech dat gutt fannen, absolut net!

**Une voix** | Mee ...

**M. Roy Reding (Liberté Chérie)** | Jo, mee! Mee kommt, mir loosse déi Saach dann emol e bëssen an hirem Kontext. All déi Mesüren, déi hei gemaach ginn, gi gemaach fir zukünfteg Aschränkungen vun der Manifestationsfräiheet. Mir setzen d'Strof vu Rebellioun erop vu sechs Méint op zwee Joer, obwuel, wéi richteg gesot ginn ass vun der Madamm Oberweis, dat ganz schwéier ze faassen ass, weini dass eng Rebellioun eng Rebellioun ass. An dat dote mécht d'Dier op, datt mer Mandat-de-dépôt kënnen géint Demonstranten erlooss ginn.

Géint d'Späizen op Mënsche si mer alleguerten. Ech wëll vu kengem bespaut ginn an ech wëll och kee bespäizen. Wann et nëmmen dee Punkt wier, géif ech dee matstëmmen.

Da komme mer bei d'Menace d'attentat: „Toute personne ayant diffusé ou répandu des substances“. Da gëtt dat souguer bestrooft, wann déi och nëmmen d'Crainte gehat hätt, et hätt kënnen eppes sinn! „Ech hat d'Crainte, datt dat Waasser a Wierklechkeet atomar verseucht war, also gëss du elo bestrooft!“ A wéi ass et mat deenen Demonstranten, déi besprutzt gi si beim Exercice vun hirer Fräiheet fir ze manifestéieren? Ass dat net eng Diffusion de substances et de liquides?

An dann déi zwou schlëmmste Saachen. Also, Doxing, dat ass jo d'Lex Reding, déi hei gestëmmt gëtt, dat ass, well ech jo eng Kéier public gemaach hunn, wéi e Journalist mir eng Ufro gestallt hat. An ech hunn näischt aneres gemaach wéi e Copier-coller vu sengem Bréif an deen diffuséiert. Ech hunn dee Moment net gesinn, datt do eng Telefonsnummer dra war. Dat beweist, wéi idiotesch déi doten Infractioun ass. Well wéi wëlls de engem Mensch nowiesen, datt en „intentionnellement“ engem seng Nummer erausginn huet, fir datt deem soll eppes geschéien? An dat war guer net meng Intentioun. Ech wollt just weisen, mat wat fir enge journalistesche Methoden

d'„Tageblatt“ géif operéieren. An duerfir hunn ech en toute transparence déi Ufro an och d'Äntwert op déi Ufro publizéiert. Haut wier ech dann also strofbar mat bis zu zwee Joer, wa mer eng Intentioun géif nogewise ginn, datt ech hätt wëllen engem schueden, wat bestëmmt net de Fall war.

An da komme mer bei dat Allerschlëmmst, dat ass d'Enquête sous pseudonyme. Et ass richteg gesot gi vum Rapporteur: Bis elo gëtt et dat just bei Infractiounen géint d'Sécherheet vum Staat, bei den Akte vun Terrorismus a vu Finanzéierung vun Terrorismus. An an deene Fäll kann ech dat och duerchaus novollzéien. Dat ass gutt, datt et dat gëtt, géint esou héich Krimineller muss ee kënnen virgoen.

Mee elo kann eng Enquête sous pseudonyme gemaach ginn – dat heescht, iergendee kontaktéiert Iech mat engem falschen Numm, ënner „Vorspiegelung falscher Tatsachen“, iwwer Facebook, iwwer Messenger, iwwer WhatsApp, wat och ëmmer –, souguer am Kader vun enger Enquête préliminaire. Ma dat ass Phishing, dat doten! Dat doten ass e Moya, fir sech anzuschleisen a sozial Reseauen. Et ass alt nees eng Kéier e Moya, fir déi sozial Reseauen ze ënnergrüen.

Dat Gesetz hei ass liberticide. An duerfir wäert Liberté – Fräiheet! – ganz bestëmmt dergéint stëmmen.

*(Hilarité)*

**M. Fernand Etgen, Président** | Merci dem Här Roy Reding. An dann hat d'Madamm Oberweis nach eng Kéier d'Wuert gefrot.

**Mme Nathalie Oberweis (déi Lénk)** | Jo, ech sinn obligéiert, eppes richtegzustellen, well ee jo hei ëmmer erëm Saachen an de Mond geluecht kritt, déi net stëmmen. An et ass jo net, wéi wann eis Aarbecht net schonn ustrengend genuch wär des Woch! Mee da muss ech dat och elo nach maachen.

Ech krut vum Riedner vun de Piraten gesot, ech géif Virfäll schéischwätzen, an notament déi Virfäll, wou Polizisten ugespaut gi sinn. Dat hunn ech net gemaach. Meng Wieder ware ganz kloer, dass mer eis vun deene Virfäll kloer distanzéieren. Dat ware meng Wieder. Ech hunn dat also net schéigeschwat.

Villmools merci.

**M. Fernand Etgen, Président** | Merci, Madamm Oberweis.

An elo huet d'Regierung d'Wuert, d'Madamm Justizminister Sam Tanson.

**Prise de position du Gouvernement**

**Mme Sam Tanson, Ministre de la Justice** | Jo, merci Iech alleguerte fir déi Diskussioun, quitte dass ech mech heiansdo gefrot hunn, iwwer wat mer elo grad géifen diskutéieren. Ech verst jo, dass den Ausléiser heivunner Erfahrungswärter waren, déi gemaach gi sinn am Kader vun de Manifestatiounen, déi nun emol stattfonnt hu ronderëm déi ganz Pandemie-situatioun, wéi mer se kannt hunn.

Dat ass awer just den Declencheur heivunner, an hei geet et net drëm, eng Covidsituatioun ze regelen. Hei geet et drëm, déi Experienzen, déi gemaach goufen, wou d'Police um Terrain, d'Autorités de poursuite festgestallt hunn: „Do si Mankoen, do mussen mer besser Moyene kréien, fir esou Situatiounen ze evitéieren“, heiduerch ze redresséieren.

An ech hunn awer d'Impressioun, wann ech hei verschiddene Leit nolauschten, et wier vergiess ginn, a wéi enger Situatioun mer dee Moment waren. Et si jo verschidde Leit, déi schwätzen hei immens gär iwwer Kriminalitéit a wéi geféierlech et am Moment zu Lëtzebuerg war.

Ech ka mech do u Samschdeger erënneren, do hunn d'Famillje sech net méi getraut, an d'Stad ze goen, ...

*(Interruption)*

... well Casseuren de Chrëschtmaart gestiermt hunn, well se do Familljen Angscht gemaach hunn, well et wirklech net méi an enger Situatioun war ... Ech selwer sinn och net méi mat menge Kanner dee Moment an d'Stad gaangen. Ech hunn déi da mëttes doheem gelooss, well et einfach Situatiounen waren, wou ee sech net méi sécher gespuert huet. An et ass awer normal, dass d'Police do hir Aarbecht mécht an do dergéint virgeet. A wa se dat net gemaach hätten a wa se dat lafe gelooss hätten, a wann dann déi Leit, déi hei Saache futti gemaach hunn an déi de Leit Angscht gemaach hunn, lafe gelooss gi wären a wann do net géigegesteiert gi wier, dann hätten ech awer grad déi selwecht gären héieren, déi elo fannen, do wär de Rechtsstaat mat Féiss getréppelt ginn! Zu engem Rechtsstaat gehéiert och, dass een, wann Infraktiounen geschéien, wa Gewalt ausgeübt gëtt, sech dat net gefale léisst! E Rechtsstaat huet och do kloer seng Limmten.

An ech muss awer och, „schmunzelen“ ass net dat richtegst Wuert, well et deet mech net schmunzelen, wa grad hei de Verrieder vun der ADR seet, et misst een Toleranz a Respekt hunn. Dat gëllt net just vis-à-vis vu Leit, déi eng aner Meinung hunn, wat de Covid ubelaangt. Dat gëllt och vis-à-vis vun Homosexuellen!

**Une voix** | Très bien!

**Mme Sam Tanson**, Ministre de la Justice | Dat gëllt och vis-à-vis vu queere Leit oder Transpersounen, déi Virlesunge maachen, an dat gëllt och vis-à-vis vun Auslänner!

**Plusieurs voix** | Très bien!

**Mme Sam Tanson**, Ministre de la Justice | Dat ass net just Respekt an Toleranz vis-à-vis vu Mënschen, déi eng aner Meinung hunn. Ech verstinn, dass een zu deem Moment eng aner Meinung iwwert de Covid konnt hunn an zu där ganzer Situatioun, wéi se deemools war. Mir maachen elo hei net de Bilan iwwert d'Pandemie. Mir hunn eis esou vill déi ganzen Zäit beschäftegt dermat, wéi wäit mer kënne goen, andeem mer all d'Rechter vun all de Mënsche respektéieren, dat heescht, déi, déi wëllen alles maache fir ze evitéieren, dass se selwer krank ginn oder dass anerer krank ginn, an déi, déi der Meinung sinn, si bräichten dat net.

Mir hu permanent jongléiert tëschent deenen zwee Rechter, déi et gëtt: d'Rechter vun deem engen op seng Fräiheet an d'Rechter vun der Allgemengheet op d'Gesondheet. An et gëtt net vill Länner an Europa, wou esou virsiichteg domadder ëmgaange ginn ass. Mir hu permanent ugepasst. Mir sinn och ëmmer erëm hei an d'Chamber komm. Mir hunn Erfahrung gezunn aus deem, wat gemaach ginn ass a wat net gemaach ginn ass.

Natierlech, mat deem Wësse vun haut hätten een nach Saache kënne besser oder anescht maachen. Dat ass jo evident. Mee sur le moment gouf et zwar ganz vill Covidexperten, mee d'Wëssen doriwwer war awer relativ limitéiert. An ech fannen et einfach wichteg, dass een net d'Saache matenee vermëscht. Hei sinn Erfahrungen, déi gemaach gi sinn, wou mer eis Zäit gelooss hunn, wou mer net mat enger ziddereger Hand legiferéiert hunn, mee wou mer probéiert hunn, dass mer fir d'Police, wann esou Situatiounen sech nach eng Kéier stellen – an e Bléck iwwert d'Grenzen eraus weist, dass esou Situatiounen sech ganz séier kënne stellen an engem Kontext, wou vill Krise sinn, wou d'Leit vill leiden ënner ville verschiddene Saachen, wou ganz séier kënne Declenchementer kommen –,

fir esou Situatiounen op d'mannst dee richtege Kader ze setzen, fir dass eis Police kann hir Aarbecht maachen.

**Plusieurs voix** | Très bien!

**Mme Sam Tanson**, Ministre de la Justice | A mir hunn och eng Kontroll vun der Police iwwer eng IGP zum Beispill. An Dir wësst, mengen ech, genausou gutt wéi ech, dass déi och do hir Aarbecht an deem dote Kontext gemaach huet an och weider wäert maachen.

**Plusieurs voix** | Très bien!

**M. Fernand Etgen**, Président | Merci der Madamm Justizministesche Sam Tanson. Parole après ministre fir den Här Fernand Kartheiser.

**M. Fernand Kartheiser** (ADR) | Jo, ech wollt reagéieren, Här President, well déi Taktik vun der Madamm Minister ass eng, déi ee relativ dacks erkennt. Dat ass, fir Kriticken, déi mir hunn op deem engen oder anere Punkt, einfach als Intoleranz wëllen ofzestempelen. Dat si mer net, mer hunn ni gesot, an ech géif absolut refuséieren, wann een dat géif soen, mir wäere géintwärtig homosexuelle Persounen intolerant. Esou eppes hu mir ni gesot!

**M. Fred Keup** (ADR) | Très bien!

**M. Fernand Kartheiser** (ADR) | Mir géifen et net maachen. Mir denken et net.

**M. Sven Clement** (Piraten) | Schwätzt mat Äre Parteikollegen!

**M. Fernand Kartheiser** (ADR) | Mir hunn Homosexueller bei eis an der Partei.

*(Interruption)*

Déi sinn eis häerzlech wëllkomm. Dat ass net de Problem. De Problem ass, dass mir opmierksam maachen op politesch Fuerderunge vun engem Deel vun deene Bewegungen, déi gesellschaftspolitesch an dat Lager ze ziele sinn, wou aner Mënscherechter, notament bei de Kanner, héchst problematesch Situatiounen kënne provozéieren. An et sinn déi, déi mir kritiséieren.

**Mme Stéphanie Empain** (déi gréng) | Et wär de Fändel.

**M. Fernand Kartheiser** (ADR) | Dann ass et net fir ze soen, mir wiere géint Homosexueller ...

**Mme Stéphanie Empain** (déi gréng) | Dir kritiséiert d'Gläichberechtigung.

**M. Fernand Kartheiser** (ADR) | ... oder intolerant géintwärtig Homosexuellen. Nee, mir kritiséiere Saache wéi eng PMA avec tiers donneurs, wéi eng Leimutterschaft an esou weider, déi vun engem Deel vun deene Leit, vun deene militantesten, do gefuerdert ginn. An do stelle mir eis dergéint, aus guddem Grund.

Bei den Transpersounen, do ass et änlech. Wann d'Elteren decidéieren, fir dat ze maachen, well d'Elteren d'Erzéiungsrecht géintwärtig hire Kanner hunn, dann ass dat eng Saach. Mee mir wieren eis einfach géint eng fréi Sexualiséierung, well dat sinn oft ganz kleng Kanner. Mir denken, dass déi net am Alter sinn, fir domadder konfrontéiert ze ginn.

**Mme Stéphanie Empain** (déi gréng) | Mir hunn eng Sexualitéit.

*(Brouhaha)*

**M. Fernand Kartheiser** (ADR) | Dir kënnt eng aner Meinung hunn, ...

*(Coups de cloche de la présidence)*

... Dir kënnt eng aner Meinung hunn, mee an esou Dossiere betoune mir d'Recht vun den Elteren, hir

Kanner ze erzéien, a mir hätte gär eng altersgerecht Sexualopklärung.

Wa mir mengen, ...

**Mme Stéphanie Empain** (déi gréng) | Iwwerhaupt keng!

**M. Fernand Kartheiser** (ADR) | ... dass dat an esou Situatiounen net erfëllt ass, da wiere mir eis dergéint an enger héiflecher Form.

*(Interruption par Mme Stéphanie Empain)*

Mir kritiséieren dat, well mer mengen, dass an der Gesellschaft och d'Recht vun den Elteren an eng altersgerecht Sexualerzëiung wichteg sinn.

*(Brouhaha)*

En drëtten Punkt an deem Kontext, dee mer hei opgeworfen haten, ...

*(Brouhaha et coups de cloche de la présidence)*

**Mme Stéphanie Empain** (déi gréng) | Et ass dach elo gutt, Här Kartheiser!

**M. Fernand Kartheiser** (ADR) | Ech hu Parole après ministre! An dann, dee Punkt wëll ech och nach soen, deen drëtten Punkt, dee mer hei opgeworfen hate viru Kuerzem, deen ass eis och hei reprochéiert ginn, dat ass, dass mir der Meinung sinn, dass Institutiounen vum Staat respektiv vun de Gemengen net solle fir Zwecker geholl gi fir zum Beispill militant Optrëtter vu Logoen, Fändelen. Do wiere mir eis och dergéint, well mir prinzipiell der Meinung sinn, dass d'Institutiounen vum Staat a vun de Gemenge sollen neutral sinn an dass déi Meinungsverschiddenheeten, ...

*(Brouhaha)*

... an dass déi Meinungsverschiddenheeten zu deenen engen oder aneren Theeme sech sollten am politesche Spill, an deem Kader, an deenen Institutiounen, auswirken, an net d'Institutioun selwer politiséieren.

Dat sinn déi dräi Punkten. Ech wollt dat kloerstellen. Ech weisen also zrëck, wat d'Madamm Minister hei gesot huet. Et gëtt keng Intoleranz op der Säit vun der ADR!

Merci.

**M. Fred Keup** (ADR) | Très bien!

*(Brouhaha)*

**M. Fernand Etgen**, Président | Merci, Här Kartheiser. Dann huet den Här Sven Clement nach d'Wuert gefrot.

**Une voix** | Wéi bei de Gréngen.

*(Hilarité)*

**M. Sven Clement** (Piraten) | Ech wëll just eppes kloerstellen, nämlech, dass dat, wat mer elo grad heibannen héieren hunn, zumindest emol geflunkert, wann net souguer gelunn ass, well Membere vun där Partei, déi elo grad geschwat huet, wëlle mir als Papp verbidden, dass mäi Kand kann eng Virlesung vun enger Transpersoun besiche goen, well se sech eebe genau zu Esch géint d'effentlech Opféierung, d'effentlech Liesung, agesat hunn. Iwwerens sollt een da vläicht net vu Fräiheet schwätzen, wann ee wëllt op eemol anere Leit verbidden, mir, wéi ech mäin Erzéiungsrecht wëll ausüben. Mäi Kand wäert an enger faarweger Gesellschaft opwuessen, déi net schwaarz a wäiss ass. An och dat ass d'Fräiheet vun den Elteren, fir ze entscheiden, ob se mat hire Kanner op esou eng fräiwëlleg Veranstaltung ginn oder net.

An ech fannen et ganz dramatesch, wann hei esou gemaach gëtt, wéi wann d'Partei ganz tolerant



wär, wa se déi ass, déi am meeschten Haass ënnert deene Poste verdeelt huet. An ech wëll och drop hiweisen, wa mer hei vun Toleranz schwätzen: Deen Deputéierten, deen elo grad geschwat huet, war deen eenzeg Deputéierten, deen, wéi mer op der Facebook-Säit vun der Chamber eise Logo fir d'„Pride Week“ a Reebooufaarwen adaptéiert haten, sech do dergéint ausgeschwat huet. Ech mengen, dat seet ganz vill iwwer seng Vue vun Toleranz aus.

**Une voix** | Très bien!

**M. Fernand Etgen, Président** | Merci, Här Clement. D'Diskussioun ass elo ofgeschloss.

Mir kommen elo zur Ofstëmmung iwwert de Projet de loi 8015. Den Text steet am Document parlementaire 8015<sup>10</sup>.

#### **Vote sur l'ensemble du projet de loi 8015 et dispense du second vote constitutionnel**

D'Ofstëmmen fänkt un. Mir maachen de Vote par procuration. De Vott ass ofgeschloss.

De Projet de loi ass bei 54 Jo-Stëmme géint 3 Nee-Stëmmen ugeholl.

*Résultat définitif après redressement : le projet de loi 8015 est adopté par 55 voix pour et 3 voix contre.*

*Ont voté oui : Mmes Diane Adehm, Nancy Arendt épouse Kemp, MM. Emile Eicher, Félix Eischen (par M. Laurent Mosar), Paul Galles (par Mme Nancy Arendt épouse Kemp), Léon Gloden, Jean-Marie Halsdorf, Mme Martine Hansen, MM. Max Hengel, Aly Kaes, Marc Lies, Mme Elisabeth Margue, M. Georges Mischo (par M. Max Hengel), Mme Octavie Modert, MM. Laurent Mosar, Gilles Roth, Jean-Paul Schaaf, Marc Spautz, Claude Wiseler et Michel Wolter ;*

*Mme Barbara Agostino, MM. Guy Arendt, André Bauler, Gilles Baum, Mme Simone Beissel, MM. Frank Colabianchi, Fernand Etgen, Gusty Graas, Mme Carole Hartmann, MM. Pim Knaff, Claude Lamberty et Mme Lydie Polfer (par M. Gusty Graas) ;*

*Mme Simone Asselborn-Bintz (par Mme Cécile Hemmen), M. Dan Biancalana, Mmes Tess Burton, Francine Closener, MM. Yves Cruchten, Mars Di Bartolomeo, Mmes Cécile Hemmen, Lydia Mutsch et M. Carlo Weber ;*

*Mme Semiray Ahmedova, M. François Benoy, Mmes Djuna Bernard, Stéphanie Empain, Chantal Gary, M. Marc Hansen, Mme Josée Lorsché, M. Charles Margue et Mme Jessie Thill ;*

*MM. Jeff Engelen, Fernand Kartheiser et Fred Keup ;*

*MM. Sven Clement et Marc Goergen.*

*Ont voté non : Mmes Myriam Cecchetti et Nathalie Oberweis ;*

*M. Roy Reding.*

Freet d'Chamber d'Dispens vum zweete Vote constitutionnel?

(Assentiment)

Et ass also esou decidéiert.

### **10. 8215 – Projet de loi portant modification de la loi modifiée du 7 mars 1980 sur l'organisation judiciaire**

Da kéime mer elo bei de Projet de loi 8215, d'Ëmsetze vu verschiddenen Dispositiounen vun der Direktiv iwwert d'Preventioun géint d'Geldwäsch an d'Finanzierung vum Terrorismus. D'Riedezäit ass nom Basismodell festgeluecht. An d'Wuert huet och hei elo den Dauerrapporteur fir haut, den honorabelen Här Charles Margue. Här Margue, Dir hutt d'Wuert.

#### **Rapport de la Commission de la Justice**

**M. Charles Margue** (déi gréng), rapporteur | Merci, Här President. Hei ass elo dee kierzte Rapport, deen ech fir haut nach um Programm hunn. Ech mengen, dat geet dann op mat der Mëttesstonn.

De Gesetzesprojet 8215, an deem reegele mer, am Gesetz vum 7. Mäerz 1980 iwwert d'Organisation judiciaire, déi noutwendeg Upassungen, fir eenzel Dispositiounen ëmzesetzen aus der Direktiv 2018/843, déi am Zesummenhang sti mat der Direktiv 2015/849 an 2009/138/CE.

De Projet 8215 gouf de 15. Mee dëst Joer vun der Justizministesch deposéiert. De Staatsrot huet en déi Woch drop, de 26. Mee, aviséiert. Den 28. Juni 2023 war en an der Justizkommissioun, de Rapporteur gouf bestëmmt an et goufen awer och dunn nach eng Serie Amendementer ugeholl.

Den Avis complémentaire vum Staatsrot krute mer den 11. Juli. Mir hunn eis an der Kommissioun den Dag drop domat befaasst an d'Amendements parlementaires ugeholl. Well de Staatsrot Gréng Luucht ginn huet zum Projet, gouf de 14. Juli de Rapport ugeholl.

Mir kruten nieft deenen zwee Aweise vum Staatsrot bis zur Redaktioun keng weider Aweisen.

Et geet hei ëm een eenzeg Artikel. D'Problematik ass déi vun der Preventioun vu Finanzsystemer am Kader vum Blanchiment oder Finanzement vum Terrorismus, méi genee d'Rechtslag, wéi d'CRF, d'Cellule de renseignements financiers, international kann zesummeschaffen, also d'CRFen aus deene verschidde Länner, wéi déi international Zesummenaarbecht soll ausgesinn.

Am Artikel 74 (5) vum Gesetz vum 7. Mäerz 1980, an deem Artikel, schreiwe mer elo am Paragraf 7: D'Ënnerscheeder an den nationale Gesetzer, wat d'Infrastrukturen betrëfft, behënneren net, dass d'CRF CRFen aus anere Länner vun der EU hëlleft, a schränke weeder den Austausch nach d'Disseminatioun, also d'Weiderleedung vun Informatiounen, nach de Gebrauch vun Informatiounen a Piëcen an.

Weider heescht et elo am Paragraf 9, drëtten Alinea: D'CRF kann d'Autorisatioun fir ze disseminéieren enger anerer CRF aus engem EU-Land net refuséieren, ausser dass déi Disseminatioun net an de Champ d'application vun der Bekämpfung vum Blanchiment oder dem Finanzement vum Terrorismus fält, oder dass déi Disseminatioun eng Enquête géif entravéieren, oder dass se géint fundamental Prinzipie géif verstouesse vum nationale Recht. All Refus muss motivéiert sinn, well et geet drëm, absolutt d'Aussagen ze limitéieren, wou d'Disseminatioun vun Informatiounen un auslännesch CRFe géif ageschränkt ginn.

Voilà, dat wär et schonns fir dee kleng Gesetze-projet. Ech ginn den Accord vun der grénger Fraktioun a soe Merci fir d'Nolauschtenen.

**Une voix** | Très bien!

**M. Fernand Etgen, Président** | Merci villmools, Här Margue.

An als éischte Riedner ass den honorabelen Här Léon Gloden ageschriwwen. Här Gloden, Dir hutt d'Wuert.

#### **Discussion générale**

**M. Léon Gloden** (CSV) | Ech soen dem Rapporteur Merci fir säi mëndlechen a schrëftleche Rapport a ginn den Accord vun der CSV-Fraktioun.

**Une voix** | Très bien!

**M. Fernand Etgen, Président** | Merci villmools, Här Gloden. An dann ass et um honorabelen Här Guy Arendt.

**M. Guy Arendt** (DP) | Merci, Här President. Ech maachen dat selwecht wéi den Här Gloden. Ech soen dem Rapporteur Merci an ech ginn den Accord vun der DP-Fraktioun.

**M. Fernand Etgen, Président** | Merci, Här Arendt. An ech ginn d'Wuert weider un den Här Dan Biancalana.

**M. Dan Biancalana** (LSAP) | Merci, Här President. Ech maachen et wéi meng Virriedner. Ech soen dem Rapporteur Merci fir säi schrëftlechen a mëndlechen Rapport a ginn och den Accord vun der LSAP-Fraktioun.

**M. Fernand Etgen, Président** | Merci, Här Biancalana. A wéi maacht Dir et, Här Kartheiser?

**M. Fernand Kartheiser** (ADR) | Ganz anescht, Här President, ganz, ganz anescht! Well ech soen zwee Sätz. Deen éischten ass de Merci fir de Rapport an datt mer et matstëmmen.

Allerdéngs wëll ech awer och soen: ënner Virbehalt! Well dat heiten ass erëm ... Mir hate jo gëschter am Ufank iwwert den Ordre du jour geschwat a wéi mer hei schaffen. An et deet eis leed, datt an engem Projet, deen awer och hei rechtsstaatlech Prinzipie béiéiert, mer esou schaffen! Datt mer hei musse liesen, datt den Avis vum Ordre des avocats, vum Barreau, vun de Gerichter, vun den Autorités judiciaires, ... also datt déi emol keng Zäit haten, fir Stellung ze huelen.

Et ass dat, wat eis leed deet, well mer mengen, datt awer an esou engem Dossier wéi deem hei et ganz wichteg wär, datt déi zoustänneg Autoritéiten awer weinstens Zäit hätten, sech mam Dossier ze befaassen an eis hir Stellungnam matzedeele.

Gutt, et geet hei ëm wichteg Saachen, Financement du terrorisme an esou weider. Mir stëmmen dat mat. Awer, wéi gesot, mir wollten awer ënnersträichen, datt dat doten an eisen Ae keng zefriddestellend legislativ Aarbecht ass.

Ech soen Iech Merci.

**M. Fernand Etgen, Président** | Merci, Här Kartheiser. An da wier et um honorabelen Här Marc Goergen.

**M. Marc Goergen** (Piraten) | Merci, Här President. Merci dem Rapporteur. Ech kann et ganz kuerz maachen: Mir ginn eisen Accord.

**M. Fernand Etgen, Président** | Merci, Här Goergen.

D'Regierung huet d'Wuert, d'Madamm Justizministesch Sam Tanson.

#### **Prise de position du Gouvernement**

**Mme Sam Tanson, Ministre de la Justice** | Jo, fir d'éischt emol alt nach eng Kéier e Merci dem Rapporteur fir dee Rapport hei. Bon, et muss een awer och preziséieren, dass et hei u sech drëms geet, sech ze conforméieren zur Direktiv, wou mer gesot kritt haten, dass d'Kommissioun der Meinung wär, si wier net korrekt transposéiert. Dat heescht, dat ass elo net en Dossier, deen elo ganz nei opgemaach gouf, mee wou mer e puer Punkte ganz liicht upassen. An et ass nun emol esou, dass mer och net ëmmer zu all Dossier en Avis kréien. Dat muss een och respektéieren. An hei war et awer wichteg, dat hu mer och am Aklank an an der Diskussioun mat der Justizkommissioun gemaach, dass mer dat heite géifen adresséieren, fir dem europäeschen Niveau gerecht ze ginn.

**M. Fernand Etgen, Président** | Merci der Madamm Justizministesch Sam Tanson. D'Diskussioun ass elo ofgeschloss.

Mir kommen elo zur Ofstëmmung iwwert de Projet de loi 8215. Den Text steet am Document parlementaire 8215<sup>4</sup>.